

Poesia in dialetto “SGUNDEN”

La Pasqua

Gran festa a l'inisi 'd Primavera
in tant post dal mond con la Césa;

dop i bagurdi in masera dal Cranval,
un pò d'arpos al fa pö bén che mal.

Quaranta dé ad Quaresma con la Pasiòn,
la fnésa al Sabat cm'al toch dal campanón.

Gesü Crist l'é resuscità e l'é vulà in Paradis,
l'é 'na sorpresa par la genta a l'impruvis.

Par la Pasqua a d'la Resüresiòn
almen 'na volta is preparen par la Cumeniòn.

I ragàs i van a dutréna a studiär i'urasiòn
par fär al més ad Mag' Cresma e Cumeniòn,

i speren int'l'öv ad Pasqua con la sorpresa,
cumprà dai genitur con poca spesa.

'Na volta in famia a gh'era poch sold,
i ragàs is cuntintaven ad öv còt,

la risdura in d'la bronza la i'à preparava,
ieren còt in dl'aqua culurada,

se po' ad öv a gh'era bundansa,
öv, grögn, sprèli, a la sira l'era la pitansa.

Par Pasqua al prémi sagri dop l'inveren,
i muntaven al festival pr'i “Cuncert” chi sunaven,

un qualdón l'andava in vacansa,
in un bel temp la so speransa.

Al Lündé ad l'Angil al famii a föra-porta
in pasegiadi cm'al cestén dal mangiar ad scorta,

e cm'al rientar a d'la sira
in dal cà la genta l'as ritira.

Al giuren dop a gh'é da lavurar
con la Pasqua in testa da smingar.



Remo Allegri